

書

陳伯玉文集卷第四

新都楊春重編



射洪楊澄校正

表

為李卿讓本官表

臣某言伏奉月日恩勅依舊授臣中大夫守司農卿臣
枯骨再生更蒙寵命魂魄競越不知所圖云臣寔庸
愚本無名節庇身公族竊軒冕之餘假翼宗枝濫衣冠
之末因循寵服累應榮班素食之責每深効拙之勤未
補橫被逆賊徐敬真以私讐架禍誣臣云與叔李逸交
通逆豎徵官執法實以極刑臣嘗領之誅已甘灰粉泉

壤之魄分隔幽冥不圖天地之恩再生枯骨日月之照
曲被幽泉察臣非辜慙臣無罪不牽文法之議特密赦
宥之慈螻蟻微軀復得全活自非陛下克明克聖至德
至仁臣之魂骸不保今日臣免死為幸豈敢期榮陛下
重加寵章還臣舊職典司宗伯以睦周親愚臣胡顏敢
冒朝典况臣叔孝逸推使未迴在於愚臣更須待罪安
敢私職以玷國章伏乞天恩照臣愚懇不勝感戴生榮
之至云云

為陳舍人讓官表

臣某言伏奉今日詔書以臣為鳳閣舍人榮命自天
寵章非次祇奉惶越顛沛失圖中謝臣以諸生宦不期

遠徒以時逢昭泰迹忝周行非有君子瑚璉之材通儒
青紫之秀已得詳刑止寺執憲南臺鸚鵡之政無聞駘
馬之榮已極陛下天飛踐祚雲紀命官陽館初開庶政
惟始金章玉式允恃其人如臣疲駑宜所避棄豈圖尚
矜庸劣昭觀欽明任同信臣寵優持革預恭詳於詔獄
叨獎渥於宸階省已循躬實知非分陛下不以榮過其
量職越其才遂欲超絕親賢參掌樞要司言鳳綽揮翰
龍池愚臣何人敢冒天造臣聞紫機務重青鎖任隆位
匪其人政由有關臣才無經濟識昧典章將何以光贊
帝猷奉揚休命物無異議政允其中臣雖小人必知不
可何況乎君子豈曰能賢伏望妙選時英旁求眾議僉

曰惟先以弼良圖愚臣懇誠非敢飾讓

為司刑袁卿讓官表

臣其言伏奉某月日勅授臣某官祇拜寵光魂首飛越中謝臣聞王者敬慎懋在典刑天下允平取茲廷尉苟非其任法不靈行臣本庸微名術無紀皆緣際會昭遇盛明謬得揚應簪徽陪奉駕鸞編繆榮祿在葦平時毫髮之功無聞於官守素餐之責每積於公朝何嘗不悚迫惟憂夙夜祗畏而天恩方被寵命仍加復蒙聖誥之榮驟觀銀章之貴永言非據稽首知慙伏惟神皇陛下恭已受圖任賢興化方其合符皇極代理天工臣亦何人敢妨賢路伏見某官弱冠登仕早有能名每以清白

洗心不為寒溫變節誠使榮加天寵職察雲司必能利
用文明哀矜庶獄弼成五教無謝於虞臣典載三墳允
諧於周議愚臣暗昧不識大猷請乞以所授官讓與某
官庶使官允其才名不失實聖明有得人之盛愚臣無
冒責之譏實在聖慈鑒非虛謬

為張著作謝父官表

臣其言臣父其守官不謹獲罪自取犯非清廉法宜不
赦實由臣為子不孝使父陷刑天恩不肅嚴科放全首
領臣得父子相見已是非圖豈謂天澤無涯更垂休命
臣父子兄弟免罪從榮載惶載殞寔慶寔躍中謝臣父
子凡品守道幽微天恩矜憫見垂來錄功承恩幸厠列

陪臣自侍奉已來於今十有八載雖業藝無紀勞動不聞小心恭勤實免愆過明明昊天實昭實察不敢有二不敢有私夙夜兢兢祇惕若厲所以父母兄弟皆荷恩私叨職謬官並預供奉摩頂至趾豈足上酬愚臣兢兢實慙實悚不意臣父衰耄恃寵忘公貪潤微財取犯朝憲應是臣不忠不孝事父無良廉耻不羞譏諫有闕遂使陷於刑法有玷國章臣之萬死無補此責刻肌刻骨泣血泣天恨負聖恩以媿朝列臣宜代父蒙罪自殞闕庭不合偷安尚求苟免誠以天波昭洗得更自新所以忍垢偷生剋躬自勵期効萬一補過酬恩灰軀糜骨以甘心願伏惟神皇陛下恩同父母矜照懇誠信其赤心

實有罄竭云云

為資州鄭使君讓官表

臣某言伏奉月日制以臣為資州刺史恭承璽命祇拜寵章匪服知慙循榮如失中謝臣學慙名術才乏器能而實應逢時金章坐忝題輿佐嶽無展驥之庸剖竹專城關懸魚之化坐嘯徒積主諾空慙伏惟陛下革命開基造天立極方且弘宣帝典大啟皇猷而四岳觀風不虛其任六條班政允屬其才臣疲朽已侵循良久昧將何式光刺舉允協得人伏願博選英才克諧僉議使人光理政洽惟良大周之命惟新愚臣之責攸息其所讓人具如別狀

為武奉御謝表

臣某言伏奉某月日詔書以臣為尚食奉御肅恭休命
祇拜寵章榮慶既崇慙荷交集臣才虧琢玉學昧蠶金
徒以席寵葭莩容光日月叨承雲渥既廣天工而策更
恩昇位非德舉無階而進坐致於青霄有慶方來載光
於朱紱臣聞瑤庭任切攸稱六尚之榮玉食禮尊寔總
八珍之貴臣術慙緣鶴業匪參龍將何致羨瓊芳式和
金鼎鴻私曲被殊寵降臨天命既不可違聖恩允宜祇
戴循涯揣分實所非圖

為王美暢謝兄官表

臣某言臣兄某前某官河蒙恩詔擢授豫州司馬未及

赴任即以某月日改亳州司馬再三策命叨荷恩私在
臣宗門實為慶幸中謝臣兄自解巾從仕三十餘年五
為縣宰三遷州佐政皆通顯職實恭勤直道在公有終
始之節平心應物無造次之慙在於周行頗蒙推薦近
屬虺貞搆逆惑亂豫州註誤平人自貽臯滅陛下憫荆
河之俗遭此無辜弔汝濱之人使其昭慶以為奉揚皇
化者必籍其才撫馭窮人者亦資有德臣兄貞固濫承
天獎遷授豫州在於天恩實為超擢今者未及赴任復
降授亳州重疊承恩翻同貶降朝廷體例實亦為尤臣
兄弟叨榮濫竊非據天慈改授不合冒聞但以始者承
恩蒙越抽擢今有何過遂同左遷區區懇誠輒敢祈訴

天澤伏願皇慈有裕降昭獎之恩臣兄竭忠獲展才之地小臣死日猶生之年

為金吾將軍陳令英請免官表

臣某頓首死罪上言臣聞軍政不減春秋責帥故揚于之亂魏絳致職所以國有明賞下無濫功臣幸以常才文武兼關始年十八投筆從戎西踰流沙東絕蒼海南征北伐無所不至席寵門緒忝迹軒墀屬高宗崇德深仁孝理天下以臣祖父兄弟一門五人皆伏節盡忠身死王事遠超臣不次授原州都督臣時年三十二職兼五印榮絕一時階緣此恩累忝藩翰持節統部前後八州皆居塞垣當賊衝要國之重寄莫與臣比雖無長策

卹戎伏胡恭守朝章保完免矢屬陛下大聖於元容愚不以臣篤怯更加寵命授以青紫遣督幽州休胡搆凶王師出討士馬雲集軍務星繁糧饋戈甲動以億計臣無田疇鄉導之策又乏杜預度支之才空竭疲單晝夜不息以勤補拙首尾三年祇縫闕漏幸無憊乏張玄遇等不謹師律賊得乘機遂敢長驅燕岳深入趙際臣又無李牧東胡之畧寔媿吳起西河之守使凶狡收數遂擾邊氓論之國憲合刎頸謝罪陛下又不以臣為辜更授清邊軍副大惣管五月恩制六月到軍逆虜天亡臣又無効至於軍功戰籍叙勲定勞副職日淺未及精覆大兵旄旆王師獻功而漢庭將軍未聞辭第雲中太守

已論增級今乃竊功謬賞有忝朝章忠誠殉節不昭國
議實由臣濫其職任過其才上不能先副聖心中不能
匡正戎律傍招物議有紊軍容臣罪何逃孰執其咎伏
願乞賜骸骨貶歸私第式清朝序永觀師貞不勝惶懼
○制曰卿出鎮窮塞作牧蒞門雖無破陣之功終有捍
城之効且膺巡警未可懸車

為副大總管屯營大將軍謝表二首

臣聞獫狁不恭周王致其大戮將軍失律漢符被其嚴
刑未有逆命驕天而逋疊鼓之罰亡師沮衆遂寬載社
之誅伏惟天冊金輪皇帝陛下肅恭上帝子育群生萬
國所以宅心百蠻由其屈膝而契丹凶狡敢竊遠臨毒

雲生靈暴殄天物皇兵順伐仗仁義以共行窮寇茲回
憑險阻而猶鬪臣等仁鸞聖略智昧詭圖遂以熊羆之
師挫於犬羊之旅誠合結纓軍壘祇罪國章陛下以堯
舜深仁且緩三苗之伐禹湯罪已不與萬方之辜遂得
齒劍餘魂更參授鉞之任死綏之魄復同挾纊之恩四
夷義以來蘇三軍感而抃舞煖瘡再起浮城定圖將士
同心誓雪孟明之恥殤魂共憤思亢杜田之讎臣等殉
義忘心報恩惟死不任感激慶戴云

謝衣表

臣今日日千騎田楷至伏奉恩勅賜臣紫衫早衫袴等
一副臣萬死骷骨盡朽蒙榮載戰載殞肝心塗地中謝

臣以驚朽叨承重任憑奉聖畧誅討元凶實合震曜天
威停斬逆首而智力淺短進退無規被王孝傑陷鋒于
前臣則接戰於後躬先士卒苦鬪山林自辰至酉殺賊
無數崑崙峻狹車乘相闖被孝傑敗兵回相衝突逆
賊乘便衆譟臣軍士卒被傷子將多死臣決命爭首陷
陣摧堯日暮兵疲瘡痍相半鳥散山谷人無鬪心臣獨
無依遂失師律即欲刎頸陣下要骨顯誠寔忍身死冠
傷未雪國耻所以含垢忍辱圖死關庭今月六日至幽
州即囚繫獄戶延到賊魄唯待嚴刑湯鑊在前分安死
土豈謂天慈矜鑒回憲增榮以其伏鎖之魄更厚賜衣
之寵煩寬踊躍載輓載惶泣血嘗膽誓復國讎刻骨刻

肌敢忘天造不勝已死再生感戴欣躍之至

為建安王破賊表

臣某言今月日得遼東都督高仇須等月日破逆賊契
丹孫萬斬等一七一陣露布并捉得生口一百人送至
軍前事三軍慶快不勝踴躍臣聞天之所棄雖暴必亡
人之共讎在遠彌戮况凶羯遺醜未及犬羊固行孽以
招誅自辜恩而取滅伏惟陛下威加四海子育百蠻鬼
神尚不敢違凶狡豈能逃罪逆賊萬斬等天奪其魄坐
自為殃仇須等謹奉廟謀遠憑國計短兵終接群逆銷
亡返風迴烟薰睛掩目此乃天威潛運神道密周豈止
人謀抑由靈助今盡滅殃病孽固折朕肌灾蕪至凋弊

日滋未加天兵應自糜爛臣訓勵士馬今月起行大軍
一臨凶寇必殄獻俘在即拜闕有期預喜承恩思勝慶
賀

為河內王等論軍功表

右金吾衛大將軍兼檢校洛州長史河內郡王臣懿宗
加爵一等勲五轉司賓卿兼羽林大將軍建安郡王攸
宜加爵一等勲七轉臣某等言伏奉月日制書錄臣等
在軍微功特加前件勲封嘉命奉至寵渥載優伏對慙
愧殞首顛越云臣聞古者名將先士卒而後身故其
功勸末世庸疇窮人力以寵已故其政乖然則篳路藍
河三軍告醉刑印在手萬夫以離夫與眾共功專已獨

利成敗之理興亡繼焉賞者國之大事故不可忽日者
林胡搆孽敢辭燕陲陛下徵義兵誅不道天下士庶
集星馳皆忘身憂國紆禍却難至於躬先矢石血塗草
莽冒艱險應寒溫氣騰青雲精貫白日誠亦勤矣雖則
聖靈威武逆虜自滅然士卒戮力亦盡其勞今大功未
酬眾議猶在而臣等駕怯猥加先封臣等不能折衝虜
庭還師衽席今坐加茅土之賜以先將士之勤使鷓寇
虎臣將何以勸今戰士留滯於外府軍吏咨差於下寮
臣等胡顏敢冒天造夫賞一勸百猶恐未孚利一阻萬
其弊誰救爵命不可以招誘國章不可以假人伏願天
光俯迺昭發軍禮請以臣等前件勲封迴受戰亡人及

立功將士等上以明國之大賞下以雪臣等謬功使人
悅亡勞士感知死然後兵可訓勵賊可誅屠此誠國之
元經不可苟而利者臣等不勝區區

為建安王謝借馬表

臣攸宜言伏奉聖慈勅借臣廐馬四疋星旗方列天馬
忽來祇拜恩榮林躍兼集臣名慙白馬陣昧青龍徒憑
廟勝之威竊總元戎之首皇師以露凶羯未字方欲親
負干戈身先士卒金山深入期突厥之功玉壺遂臨叨
得駿之賜昔開東道今見西來感燕骨而長鳴君恩固
報向朔雲而驤首蹋頤方擒坐馳千里寔愧三軍寵貴
非圖榮多增懼

奏白鼠表

臣某言今日日臣等令中道前軍總管王孝傑進軍平
州十九日行次漁陽界晝有白鼠入營孝傑捕得籠送
者身如白雪目似黃金頭目踰伏帖若無氣將士同見
皆謂賊降之徵臣聞鼠者坎精孽胡之象穿竊為盜凶
賊之徒固合穴處野居宵行晝伏今日日歸命素質伏
辜天亡之徵兆寔先露自孝傑發後再有賊中信來不
謀同詞皆云盡滅病死親離眾潰匪朝即夕臣訓兵勵
勇取亂侮亡昔宋剋鮮卑蒼鶻入幕今聖威遠振白鼠
投營休地同符實如靈契凡在將士孰不歡欣執誠獻
俘期在不遠

為僧謝諱表

僧某言一昨預內道場諱息初殊獎賜有褒祿死罪死
罪其實專蒙昧于至道徒以早栖真寔委真香緣遂以
濫越殊私光照寵渥日者法宮聞道諱賜承恩叨玉塵
之榮預金闈之議遂得對揚真會咫尺天威徒有明恩
卒無出贊不能絕王倪之問以默考詞息毗耶之言冥
通得意天休光被曲見杯揚羣議允懷猥忘其陋顧揣
涯分寔覘心類將何冀亮緇徒發揮玄極以念嘉惠怵
惕惟憂載懷愚瞽而心况知愧無任慚荷之至

謝藥表

臣某言伏奉中使宣勅旨賜貧道藥總若干味肅恭沐

命敬受慚惶猥以眇身叨蒙大願聖方交同問疾之
榮施等醫王感能仁之惠雖楮鞭初授未可比其英蕤
赤芥仙圖固以謝其靈氣方將駐茲營魄獨被哀痾以
要上品之經將奔大年之壽人微惠重答施何階不勝

云

為喬補闕論突厥表

臣某言臣以專蒙叨幸近侍陛下不以臣不肖持勅臣
攝侍御史監護燕然西軍臣自違闕庭應涉秋夏徒居
邊徼無尺寸之功臣識暗劣孤負聖明然臣久在邊隅
夙夜勤灼莫不以著事為念但按察之比以突厥離亂
事跡參驗委曲窮問往來竊竊以得其真莫不自為鯨

鯢逆相吞食流離殘餓莫知正歸臣誠愚不識事機然
竊以往古之變考驗於今乃知一天亡凶醜之時陛下收
功之日然臣聞之難得易失之時也易遇難見者機也
聖人所責者去禍於未萌今陛下體上聖之資開太平
之化匈奴為中國之患自上代而下若以矣今天降其災
以受陛下萬代之業在於今此臣請以秦漢以來事跡
證明之伏願陛下少留聖聽可釋者察天下幸甚臣聞
始皇之時併吞六國制有天下一按劍叱咤八荒犇馳然
匈奴疆梁威不能服牧馬河一以侵邊疆始皇赫然使
蒙恬將四十萬衆北築長城一以逐胡取其河南之地
七百余里當時燕齊海岱一給費徭役煩苦人以不

善故長城未畢而閔氏之禍一為其患二世而亡莫不
始於事胡也至漢興高祖受命率群雄乘利便以三十
萬衆塞邊白登七日被圍僅而獲免自是應呂太后至
孝文帝單于傑驚益陵漢家一文帝徒以遜詞致獻金帛
但求其善和而已不敢有圖一賈誼所以哭之痛文帝以
天下盛而早事戎狄以倒懸天下也景帝時邊受其患
于是漢武踐祚以承六代鴻一業屬乎文景玄默之化海
內又安太倉之粟紅腐而不可食內庫之錢貫朽而不
可校財力雄富士馬精疆忿匈奴之驕慢將報先帝之
辱遂使王恢韓安國將三十萬衆以馬邑誘單于師出
徒費竟無毫髮之功於是大帥專以伐胡為務首

尾三十餘年中國騷然大受其弊至于國用不足軍興
不給租及六畜筭及舡車盜賊羣興京師起亂竟不能
制單于之命一日而臣服之宗衰殘幾至覆社稷也
故漢武晚年戢兵革之弊乃下哀痛之詔罷輪臺之遊
封丞相為富民侯將以蘇中國也至宣帝代罕復出師
屬匈奴數窮天降其禍蓋閭閻渠單于病死右賢王屠
耆堂代立骨肉大臣自不相服又立虛閭權渠子為呼
韓邪單于擊殺屠耆堂諸名王貴人各自分立為五軍
于更相攻擊以至大亂殘害者計萬億數畜產耗滅
十至八九人以飢餓相燔燒以求食于是寄命無所諸
名王貴人右伊祿訾且渠當戶以下將兵五萬稽首來

降於北方晏然靡有兵革之事直至哀平之際邊人以
安臣竊以此觀匈奴之形察天時之變盛衰存亡之機
事可見也然則匈奴不滅中國未可安卧亦明矣夫以
漢祖之畧武帝之雄謀臣勇將勢盛雷電窮兵黷武傾
天下以事之終不能屈一王祿一國宣帝承衰竭之後
撫瘡痍之人不敢惕然有出師之意然而未有遺矢之
費而臣僕於單于之長者其故何哉蓋盛衰有時理亂
有數故曰聖人備備以待時是以正天下如拾遺陛下
肅然神明德動天地今上帝降匈奴之災孽遺陛下之
良時不以此時順天誅違大業使時過凶虜復興則萬
代為患雖後悔之亦不及矣古語曰天與不取反受其

卦今天意厚矣陛下豈可違之哉臣比在同城接居延
海西逼近淮南口其磧北突厥來入者莫不一一臣所
委察比者歸化首尾相仍携幼扶老已過數萬然而瘡
痍羸瘵皆無人色饑餓道死頗亦相繼先九姓中遭大
旱經今三年矣野皆赤地少有生草以此羊馬死耗十
至七八今所來者皆亦稍能勝致始得渡磧磧路既長
又無好水草羊馬因此重以死盡莫不掘野鼠食草根
或自相食以活嗟命臣且委細問其磧北事皆異口同
辭又耆老云自有九姓來未曾見此飢餓之甚今者同
羅僕固都督早已伏誅為亂之元其自喪滅其餘外小
醜徒侵暴自賊耳本無遠圖多獵葛復自相讎人被塗

炭逆順相半莫知所安回鶻諸部落又與金州橫相屠
戮群生無主號訴嗷嗷臣所以願陛下建大策行遠圖
大定北戎不勞陛下拍揮之間事業可致則千載之後
邊鄙無虞中國之人得安枕而卧豈不在陛下斯哉且
匈奴為中國患非獨秦漢之間臣竊惟先聖時衛公李
靖蓋中國之一老臣徒籍先帝之威用妙勝之策當頓
利可汗全盛之日曰機逐使大破虜庭遂繫其侯王裂
其郡縣六十年將于今矣使中國晏然斥堠不警書之
唐史傳之無窮至今天下謂之為神况陛下統先帝之
業履至尊之位醜虜狂悖大亂邊陲皇天遺陛下以鴻
基之時陛下又得復先帝之跡德之大者其何以加若

失此機事以過往使李靖豎子獨成千載之名臣愚竊
為陛下不取也伏見去月日勅令同城權置安北都護
府以招納亡叛振匈奴之喉臣伏慶陛下見幾于萬里
之外得制匈奴之士策臣聞隗囂言漢光武見事于萬
里之外制敵應變未嘗有遺今陛下超然神鑒遠照寔
所謂聖明之見觀于無形也臣比往同城周觀其地利
又博聞諳知山川者莫不悉備其地東西及北皆是大
磧磧並石鹵水草不生突厥嘗所大入道莫過同城今
居延海澤接張液河中間堪營田處數百千頃水草畜
牧供巨萬又甘州諸屯犬牙相接見所畜粟麥積數十
萬田曰水利種無不收運到同城其省功費又居延河

海多有魚鹽此可謂強兵用武之國也陛下若調選天
下精兵采拔名將任以同城都護臣愚料之不用三萬
陛下大業不出數年可坐而取成臣比未看國家典兵
但循於常軌主將不選士卒不練徒如驅市人以戰耳
故臨陣對寇未嘗不先自潰散遂使夷狄乘利輕於國
威兵愈出而事愈屈蓋是國家自過計於敵爾故非小
醜能有異圖臣竊以為陛下今日不更為之圖以激勵
天下忠勇但欲以今日之兵今日之將冀收功於異域
建業於中興則臣之愚蒙必以為未可得也陛下即以
突厥為萬代之患則臣所言願加察若以夷狄荒非不
臣小人非所敢諫臣今監領後軍某等取其月即度磧

去計至某日及劉敬同謹當親按行債計至比已來地
形及突厥滅亡之勢當審虛實續以聞奏伏願陛下省
臣此章為國大計儻萬有一可中者請與三事大夫熟
圖議之此亦萬代一時也伏願少留聖意閑暇念之天
下幸甚陛下採臣芻蕘臣請執及先驅為士卒啟行橫
行匈奴之庭歸報陛下臣死之日庶無遺恨不勝云云

陳伯玉文集卷第四

陳伯玉文集卷第五

新都楊春重編

射洪楊澄校正

碑文

昭夷子趙氏碑

昭夷子諱元亮字貞固汲人也本居河澗世為大儒至
祖挾九博雅耽道隋徵八學士與同郡劉焯俱至京師
補黎陽郡長始居汲焉有二子禮與禮輅輅與官至臨頴
縣丞輅為較書郎並著名當代昭夷禮輅與季子也元精
冲懿有英雄之姿學不常師志在遐遠年二十七褐衣
游洛陽天下名流翕然宗仰郡蒙以初筮求我昭夷以

玄轂發機故蓬居窮巷軒冕結轍時世議迫阨不容其
高乃屈身泥蟠求祿下位爲幽州宜祿尉到職逾歲默
然無言唯採藥彈琴詠堯舜而已州將郡守穆然承風
君之道標浩如也回巡田入隴山見烏支丹穴密有潛
憤之意蒼龍甲申歲在大梁遭命不造發痲疾而卒時
四十九爲呼哀哉天下士人聞之知與不知莫不爲之
垂涕蓋傷其有濟世之量而無長世之年夫上德道全
器無不順中庸以降才好則偏有張也之莊無展也之
道好由也之勇緬回也之仁侈宰予之言遺澹臺之行
務端木之智忘甯武之愚或正而不奇或達而過離君
獨五味足六氣和通衆賢之不魚暢群才之大遠雖不

至於聖道其殆庶乎故人無間言物飽其義吾嘗論人
事有十君得其九一不至者命也夫於戲名聞天下而
不達於堂上智周萬物而不達乎一人也其時歟其事
歟君故人雲居沙門釋法成嵩山道士司馬子微終南
山范陽盧藏用御史中丞鉅鹿魏元忠監察御史吳郡
陸餘慶秦州長史平昌孟詵雍州司功太原王遠洛州
參軍西河宋之問安定主簿博陵崔瑗咸痛君中天鼎
飢不實百代祀德故老或云以爲名者德之表謚者行
之跡君囊括世道屯位明艱困乎統光景不耀乃共
稽陟舊行考謚定名問於元著象曰明夷于昭夷昔歟
才位不兼大連有數嘗哀時命而作頌云諸公以余後

君之遊寂以故秉翰參詳叙其頌曰人道完運兮物各有時匪時不生兮匪運不成昔者元精回瀟陽九滔災大感生竟禹恢能陰陽既和玄帝傳家五百數終繼驚暴邪子乙提連水火革期匪賢不昌尹乃阿衡六百運徂受始淫狂西伯考元應在躬昌匪雄不決匪謀不藏姜牙浩首實逢其良投釣指麾奄有八荒周有天下七百餘年太公之後不聞大賢豈無仲尼負道周旋無勢一契無土一塵然則大運之所未時哉時時隘業隘運巨功巨苟非其時草木為伍昭夷作頌尔又嘗著汲人默記言變化之事且曰清尔靈龜永晏息乎浩初臨邛縣令封君遺愛碑

叙曰蒼生蚩蚩其動也直蓋類蒙乎聖人顯顯其汲也

及也下無教務王皇中乎則時至其理衡之君公砥其

有也機馭之師之非能駿尊上帝保又黎元誰則荷天之寵

祈人之肅行其禮樂雖觀於中和裕其廉平戴聞於謠

詠我之遺愛者不從事於是邪嘗試論之公名某字某

渤海菑人也昔后稷有德於邠文王受圖於錫珍符冊

命始自於西周珪社逮侯奄荒於東土表鼎軒冕有家

代焉曾祖子繡齊頡川渤海三郡太守霍州刺史隋通

直即通州刺史榮分麾蓋道通循良時雨洽於齊陳惠

風被於唐楚祖德於北齊著作郎隋扶風郡南陽縣令

芸高韻與見天下之圖石柱闍琴知君子之化父安壽

皇朝尚衣直長懷州司馬嘉州刺史湖州刺史良二千
石聞乎共理之尊肇十二州策多刺舉之首公則使君
第某子也冲和誕命光大含章實公侯之子孫有山河
之氣象明不外飾默昭於玄機敏實內融養蒙於用晦
故其廉不直物恕不由衷崇善足以利仁自彊足以從
事有朋友之信焉有閨門之肅焉非夫恭人其孰能景
行行之者也年始若干為國子生言經大學之遊以觀
先生之道某年以明經擢第解褐守恒州叅軍秩滿補
許州司法叅軍許惟舊國陳實參巫君子豐明利用乎
獄載以課窮累加秩焉又轉汝州司兵叅軍叅臺松脈
一旦成市非刮器者政以多荒公實佐之官無留事信

矣乎能其理者有其任濟其業者享其功我豈蒙求物
思其理某年選補臨邛縣令夫蜀都天府之國金城鐵
冶而俗以財雄戈獵田池而士多豪侈此邦之政舊難
其人公按轡清途下車而率覽其謠俗永歎於良圖想
其風流慨然於惠化以為太上之理因人者也通變之
機隨時者也必使無訟不亦由吾用乎利貞夫何在物
於是謀其教令肅其儀刑敬其事以順其人正其間以
利其義以為昔者聖人之務本也在于稼穡有稼穡然
後可以養人故公之勸人也用天之道分地之利以為
昔者聖人之利用也實在財貨有財貨然後可以聚人
故公之化居也質遷有無和其衆寡以為昔者聖人之

事生也謹其制度然後可以富故公之節用飲食有節
車服有教以為昔者聖人之事死也慎其喪祭有喪祭
然後可以睦人故公之送死也葬之以禮祭之以禮以
為昔者聖人之用獄也崇其法制有法制然後可以禁
人故公之恤刑也唯齊非齊有倫有要夫如是者豈獨
其利哉惟欲潔乎其源正乎其本慎之於謀始要之於
用終將使獄數矯虔而是以息孤寡不穀而是以寧者
哉夫然後磨之以仁琢之以義使男女異路班白不提
熙乎其若春肅乎其若神然後文以禮樂幾乎以淳朴
道豈遠乎嗚呼是天不悅降此荼毒某年以大夫憂
去職于時公之在始逾年矣然三載考績是用未成百

姓哀惶人吏嗟咨怨咸云我父矣而人悴矣鄉望老人
前其官等五百餘人或金隄之秀玉宇之英而服美於
寬允嚴祗於教義遂走之州府訴之上官冀奪其哀摧
禮終秩不謀而同者日有百數司馬元公帝王之胤也
康歌協化威德在人憫烝庶之求思嘉我君之懿績以
為古之借寇者何以踰是哉遂用疇咨舊章允懷吐誦
奪之公禮上之于文昌臺非將協贊天工慰彼黎庶君
子之教而日見之哉班白之老胥史之徒又以天子在
宸勤必孝理我君云邁誰其嗣之千餘人復連表詣闕
投匭乞君以墨練從事違違焉若有望而未至也鬱陶
增思寤寐永歎將欲思謨不朽想見懿德乃相與言曰

昔者君子思其人而愛其樹蒙其澤則歌其詩封君之
仁我無金石乎又述其行狀訪余以銘勒之事縣丞等
有弼諧之美力筆之能永思清風歎息仁化尉安定梁
慎盈知名之士也墨妙幾於草聖文義摠於辭雄昔仕
京畿左遷此職自以為質封君之化有日矣承封君之
德有年矣夫其忠信之教寬猛之機古之官人君其殆
庶乎父老之請允矣余耄耋耒舊國傳據其實恭聞其去
思而親覩其遺愛余所備者敢博斯文猶懼後生有言
以為口實河東薛稷隋內使公之孫也文章之伯而時
所宗故憑其實錄寄之為頌其詞曰

天地之間有渤海焉伯宗伯谷神山在焉精氣飛騰生

良宰焉良宰寔生代祿代卿君達好遺風雲上征武興
察孝州郡有聲陳其弓治戴其簪纓筮仕斯邑我龜觀
貞深期高悟絕策遠明既至肅肅其來英英臨事若祭
視人如嬰三農勉用不獄以情輕重共用穀貸以平我
棠旣藪我籃斯盈於惟我君張仲孝友家膺五福堂享
三壽溫清不違喜懼無守枯魚御素疾風過牖匪降自
天誰執其咎棘心劬勞匪義伊蒿彼蒼不弔惟其永號
惜寇為請惠此嗷嗷曾是奔告謂天蓋高昇仙橋下赤
車使者客於臨邛文雅雍容觀風萬里謁帝九重嗟嗟
其舊推牛擊鐘門於君墨借翰雕龍專思君兮不返伐
石登山山高兮望遠懷車馬於言告欲絃歌於言偃人

寔去思我無愧詞

續唐故中岳體玄先生潘尊師碑頌并序

尊師業尚冲密動發幽深理心事天所保惟畜絕聖素
智不耀其光故真感冥期珍圖秘學性與天道不可得
而聞也若乃崇標曠迹遐情遠意志摩青雲蓬視紫闥
高宗每降鑿輦親詣精廬尊師身不下堂接手而已每
歎曰大丈夫業於道不能投身霄嶺滅景雲林而疲痾
此山以煩世主吾之過也遂欲東求蓬萊孤舟入海屬
天皇敦篤斯道祈歎逾深知躡山隅絕策未往既而金
草有命鑿鑿遺區於戲昔孤射有神人克輕天下崆峒
有至道軒后順風玄真高蹤萬古同德何其感哉尊師

有弟子十人並仙階之秀然鸞姿鳳骨眇愛雲松者惟
隸川韓法昭河內司馬子微皆稟訓瑤庭密受瓊室專
太清之業遺下仙之儔谷汲芝耕水動於我蓋應歲紀
也始尊師受籙於茅山昇玄王君王君受道於華陽隱
君陶公陶公至子微二百歲矣而玄標仙骨雅似華陽
夫階真蹈冥練景遊化者其必有類乎法昭等永惟尊
師靈跡洞業高深邁古而燾世往矣其若之何乃斷石
幽山申頌玄德其頌曰

觀元化兮求古之列仙德瑤圖與金鼎信元符之自然
仲與道而惟一天與人兮相連為精守以專密必駕景
而凌烟丹丘不死兮羨門弟子黃宮度世兮吾體玄體

玄之至德兮洵淑美冲心養和寶元始初學茅山濟江
水乃入華陽洞天裏道逢真人昇玄子授以寶書青台
旨令守崧山玉女峯雲栖窮林今五紀聖人以萬機為
貴而我以天下為累聖人以大尊為尊而我以天下為
煩是以冥居於喂螺寄遺跡於軒轅有唐高宗兮天子
之光好道樂仙思雲鄉千旌萬騎兮翠鳳凰敷我汝海
兮箕山陽朝拜白茅夕紫房齋心潔意緬相望祈問玉
真及玉皇何以得之受天昌黃庭中人在子身宵宵冥
冥精一作情甚真去汝驕氣與淫神動能思之道自親遂
解形而遺世乘白雲以上賓弟子不知其所如也乃刻
石以思其人

漢州雒縣令張君吏人頌德碑并序

至哉天子在穆清之中端玄默之化萬國日見百姓以
親誰其昭宣令長其任也然則國有大小政有污隆遭
其和平則循理之功易值其凋瘵則革弊之業難况罹
乎荐瘥救其塗炭力倍於中而功不半之則盡其仁而
澤未全洽則我府君當欽明之世承苛隱之蓋緝頽靡
之餘遂能撫寧矜殘溥耀敦懿改制立憲昭德顯仁寄
跡光乎曩賢惠風穆於茲日我行千里而得一賢傳曰
夫用我者而豈徒我府君姓張氏名知古蓋漢少傅留
侯之裔也昔留侯得滄海力士東執於秦遇黃石老人
西歸於漢山河鍾鼎子孫保之世在閩中今為宜州人

也高祖藝周恒州司馬曾祖歡隋許州司馬祖雄唐并
州掾次令考琳原州平原令皆稟瑚璉之器著經濟之
才大位不躋元德滋茂其昭祉復蔽於我府君府君體
英竒之姿冲希默之量齊敏內肅端簡外融夫其孝友
睦婣研幾成務深斷守節之固撥煩簡要之能在於家
邦聞其政矣起家補同州朝邑尉歷太州鄭縣尉左金
吾衛倉曹參軍洛州洛陽主簿黃圖左翊豪俠所湊赤
墀佐理寔賴其能又遷雍州明堂縣丞時皇帝恭默明
臺清問下吏西南矜寡有詞上官曰刺史沓貪而苛縣
令威施而忍奸宄因豐群行效敷哀哉毗黎顛在荼毒
朝廷憫之帝曰俞允哉乃用勅撫此荒邑意喜昔者苛

政未作對境保安茲都衝要衿帶全蜀百濮兼錯萬裔
之泉寶利珍貨盡四海矣殆殘猛肆至蠹賊刃訐始於
碩鼠之侵終屠餓狼之豕杼軸既盡郭邑殆空悲夫仲
尼云苛政虐於猛虎豈猛虎而已哉我府君殷然始宣
皇明恭職事巡省黃髮周爰令圖所以綏亡固存蠲
去暴與百姓更始者輿人斐然乃作誦曰我有聖帝撫
令君遭暴昏祿惇寡紛民戶流散日月曠君去來兮惠
我仁百姓蘇矣見陽春然不躬不親庶民不信於是府
君知人散久矣黷於詐罔已曰未遂躬六曹之務先五
美之訓下官斂手年食莘心人始翕如也初官戶在版
圖者萬有五千餘家應政侵殘逃者過半歲月永以廬

井涇蕪蠡蚘在堂蟋蟀空歎先是有物天下逃人歸復
舊業者免當年租庸公以事遠能逐政之大端乃下令
曰於戲天子誠憫斯人是用命我其訖有濟若通不及
患幽不能明吾之罪人部內有逃越他境能相率歸者
免一歲租及征徭若惇嫠貧窶不能自濟者當別議優
之其長正耆老可明喻此誠使被幽谷令既下克已示
信或有逃者引首而歸公親循寧尉贍理其業於是小
大悅賚遠近承風四封諸通一朝景附夫負妻戴子荷
策提笠首尾郊郭者凡七千餘家熙乎若鴻鴈之得春
也既至矣則勞來之既止矣則安緝之或三年或十年
舊館已無喬木猶在公緝屋塗室雍陌開阡為其井疆

人得其居矣田畷失業農野榛荒此邦膏腴利在江浸
有金鴈白魚二水是其朝雲澤麓無虞澤畛填塞公濬
其塗洫川澮始通人得就畊矣流亡初復貧窶兼半食
不糊口力未贍農公又假富資貧耦耕分種助其鉅刈
歲以有年人得其食矣曩者征稅橫收商旅不行貿遺
有無廛肆半絕公阜其貨財交易復通日中噬嗑人得
其利矣乃種樹畜牧蠶漁工賈什伯之器車服之庸婚
姻之時喪祭之禮莫不盡為度教制其權衡征賦既均
千室如一於是百姓允賴鼓舞而歌其歌詩凡六章題
曰逸還樂其首章蓋言天子之德也其二章闕前政之
害也其三章喜公惠之至也其四章言逸還之樂也其

五章義公化行而奸慝不興也其六章善政令平均賦
歛不淫也時日月會于龍栿歲功成平孟冬百嘉備烝
品物咸乂府君乃稽版籍攷幽明親巡乎邦廬存問乎
鰥老黃耆稚齒山原之民乃接手慶歌迎擁馬首累乎
道路者以百千輩晝肆酒夜聯燭羣舞蹈詠迎途餞郊
皆歌前六章慶公惠也是以封內歡康境外萌動企公
德美有若神明府君嘗因公事至成都成都之民駕肩
相矚蓋籍甚其異也封人有喪者廬于墓側鞠然在疚
負土成墳公親從寮吏吊其苦席自是禮讓行焉學校
興焉長史河南竇公旌別尚賢廉簡居政以公甄理頽
弊躋美中和厯政逋亡一朝狎至遂表其狀奏之于闕

處屬獯鬻孔亟戎車未暇郊壘既夷邦憲清穆刺史而
陽張公瞻悻卧理寬猛以濟儒術兼優吏畏獨坐人歌
來喜甄綜品鑒物無遺才又以公保邦乂民勝殘去殺
重理前秩昇聞宸扆夫昇聞者豈循良而已乎蓋激清
廟貪僭善懲惡祈元嘉命優公寵章於是鄉旌邦老華
髮好首或名淹玉壘家擅銅山如王弘馬靖等若干人
皆以政洽仁顯功著頌宣揚金帛嘉止不日而至至則
國肥矣去則民瘠矣凡我邦族其將疇依兄弟睦親不
可以從往也筐篚玉帛不足以永貺也隔千里而不昧
與百姓而長存非刻金石列圖象揚弘懿崇耿光則顯
然衆情孰克慰滿於是乃從旅鑿峴巖自金水之山得

王政之石農夫田婦担扛力運皆懼公往遺像莫瞻共
琢之磨之議之謀之子昂時因歸寧采藥岐嶺父老乃
載酒邀諸途論府君之深仁訪生祠之故事永我以典
禮博我以文章夫千里一賢義者所貴今百城一理公
獨有之不熙其烈光以示當世則孱弱者胡以激節貪
垢者曷以浚心敦回此義乃此謠而作頌曰 頌缺

九隴縣獨孤丞遺愛碑

彭州九隴縣丞獨孤君有恭懿之行柔毅之才臨官以
莊敬事而信清白苦節勤恪原躬廉而不矜利以不悅
有特立之操焉在任四年無一日自倦精專力務澤溱
氣通天彭之人陶然大化居秩歲滿單車告歸邦思其

仁國詠遺愛乃樹碑刻石追崇庶庸既頌歎之又思福
之以金仙世尊慈善萬物遂貢金鑄像祈祉冥休悠悠
之人至今稱賴夫官不必貴政惟其才獨孤丞上追稟
君下雜群尉文墨教令不專在躬然力行務仁推誠愛
物謳吟者不歌其宰頌議者必歸於丞豈欺也哉吾每
聞一言可以永寧天下者在能官人而已苟謬其任綱
維以頹感獨孤丞智效一鄉惠孚百里况其大者乎於
戲官人執乃作頌曰

於維國家建官以理得人則盛匪人則圯英英我君清
節素履恭寬敏惠將順其美禮實在躬人以知耻歲秩
其暮薄言歸止祁祁吏人何嗟及矣涕戀沱若遺愛罔

已瞻德樹碑造真祈祉不有其惠孰能享此悠悠彭門
千載有紀

唐故朝議大夫梓州長史楊府君碑

君諱越字復珪弘農仙掌人也其先帝高辛氏之裔周
有天下晉受其封至宣公伯喬草基楊若乃彤弓旅矢
巨壺亦弗則禮命之樂歌之崇天王之寵光保元侯之
休祉其後十六代有楊實者天錫黃鳥授以白環若曰
命君子孫世登三事迨震康彪賜四代五公烈光昭于
漢室盛德允於海內金圭銘鼎至今為弘農世家也高
祖椿魏尚書右僕射開府儀同三司司徒公進位太保
加侍中給後部鼓吹致仕歸邑賜安車駟馬傳制二人

可謂國之元老帝之師臣功成名遂社稷之寶曾祖思
善齊通直散騎常侍祖敬通鎮遠將軍鄭州治中烈士
名節公即萬城府君之第二子也少而冲嶷苦節貞素
禮非玉帛室有琴書聞少連之風而悅之廢乎身有權
行中清上以察乎道下以敦乎物不應州郡之命而有
金玉之心嘗歎曰以明月珠彈千仞雀吾不能也於是
觀寶龜之象心滅朶頤探金虎之爻志存幽履遂去家
遁于嵩山經十餘年丹山白雲之志眇然矣屬太宗文
武聖皇帝初臨天下物色幽人焚山榜道網羅遺逸君
子若曰天下有道可以見矣於是始以角巾應命褐衣
詣闕陳大道之宏暮論至公於天下帝曰俞爾言乃可

底行若歲大旱用汝作霖雨今南山近塞北漢連胡石
州邊烽皇化未謐汝往欽哉輯乃人禦乃敵以息匈奴
之患始解褐授石州方山令擢組在堂干旄在階布大
信於獯戎示折衝於衽席威名震曜乃昇聞也有勅授
憲臺監察御史繡衣始拜珥筆昇朝臺閣以之生風豪
貴由其斂手又勅直中書待制未幾又遷秘書郎直中
書省如故遊鳳凰之池觀蓬萊之府是天下之榮踐也
又轉宗正寺丞歲餘帝思南史之才將宗東觀之美又
遣起居郎加騎都尉龍朔中天子將觀兵於東夷以復
先帝之業凡居中者多出尋旁郡是歲授公朝散大夫
涂冀州司馬又轉魏州司馬皆知州事于時天下唯韓

而雄魏壯武而柔文公始厥承明初臨外郡探究壘面
犯禁崇姦欲嘗朱博之能以觀龔遂之政公深鈎潛往
英機立斷短豚精裾於是乎理麟德初兼梓州長史蓋
在華之南區彭之北鄙入豪俗侈政削公賧攢六國之
遺昵離三巴之輿壤公下車問俗觀風立政先之禮讓
教以詩書抑浮窳禁蟲食至於堂叩鐘磬家擅山川莫
不為之節制行其典禮會來之頌復起於斯時高宗大
帝方接千載之統昇中太山玉帛雲趨朝者萬國公預
陪金蹕侍拜瑤壇白雲既封皇慶斯洽加朝散大夫餘
官如故東山拜命西駕未歸逢太歲之臨辰感殷楹之
夢奠過疾薨於官舍時年六十四嗚呼哀哉遺令薄葬

不藏珠玉唯孝經一卷堯典一篇昭後嗣不忘聖道即以某年月日葬於西嶽習仙鄉登仙里之西麓遵遺命也嗣子嘉賓等哀號泣血柴骨藥心緬惟罔極之恩思宗永錫之道以為吾丘子沒無助冥因李由也歎空勤負米於是攷羣聖之典探衆妙之門求所以昭報幽局贊社冥籍則云金位慈救寶手來迎若德崇於此則功濟於彼是用歸減真諦祈祐能仁箱鐵圍而寓容現金遠而得像遂於登仙麓瑩之側造阿彌陀像一軀坐高三丈并象變菩薩天人畢備全金湧出衆寶裝嚴雲仙鬼神周羅上界珠幡羽蓋圍所以丕顯尊靈光昭惠業達人之能事畢矣孝子之事親終矣銘曰

巖巖大岳澆澆長河鼓雲滄霧含靈行和揚侯之國宛其中阿子孫瓜瓞軒蓋駢羅○四代五公自伯起蟬聯彪懿令聞不已二千戶侯三十刺史世濟其榮至我君子○我我君子皎有令光不寵我組而括我囊洗心巖道抗跡雲翔冥鴻不遠白駒在場○解其蘿袂縮我墨職邊翔多雲檢稅孔棘之子之往允威允德干旄在階烽火罷色○行行駿馬繡衣之光烈烈董狐司史之良而我君子搃其徽章出同巖助政穆王祥○雄魏既康鄴蜀猶修攬轡言邁題輿載理尺兵允戢亂繩收靡天子登封拜服玉趾○大禮既畢歸路遲遲歲亦秋止天不憖遺嗚呼叱夷號泣漣西曷其往矣東暮歌思○

覽楚孤子棘心哀疾永號昊天眇泣冥祐蓮花之國金
池至雷崇此香緣生彼穠秀○全金既湧衆寶斯莊攷
墳其左叔豎其旁香花園繞松栢成行千秋萬歲祚祉
無疆○

梓州射洪縣武東山故居士陳君碑

君諱嗣字弘嗣其先陳國人也漢末淪喪八代祖祗自
汝南仕蜀為尚書令其後蜀為晉所滅子孫避晉不仕
居涪南武東山與唐胡白趙五姓置立新城郡部制二
縣而四姓宗之世為郡長蕭齊之末有太平者兄弟三
人為郡豪傑梁武帝受禪網羅英豪拜太平為新城郡
守尋加本州別駕弟太樂太蒙蒙為黎州長史都督護

南梁二郡太守樂為下郡司馬即君之高祖父也生曾
祖方慶好道不樂為仕得墨子五行秘書而隱於武東
山生烈祖湯仕郡為主簿遇梁季喪亂避世不仕生皇
考廣迥迥早卒君即迥之第二子也少孤而有純德恭
已飾行一日三省家世本以清白崇德迨君之孤素業
空矣君有仁兄養母以孝君順至行同勤苦節夏不避
暑冬不避寒蒸蒸服事行年四十有五入則孝出則弟
謹而信泥愛衆而親仁無餘力也以是不憂於道遠親
終終春秋已高從事不可以養矣乃輟干祿之學修養
生之藟山壑高居農野永歲雅聞漢有王丹者隱居不
仕家累千金以自奉田稼勤者載酒肴從鄉里承化以

相德汎乃歎曰彼王丹者是為政矣矣其為政也由是始收林澤闢良田買山書務農政天道時變地道化成丘陵泉竅星歲雲物靡不用心也原田每每稔黍稷稼汶陽之稼如雲矣春日載華歲聿其秋白露時降百穀收熟君常乘犁肩耒者農夫饋田畷刑以肅情悅以勞勤若孫吳之用兵鷲鳥之搏擊也卓彼碩田歲取十千倉庫寔崇禮節恤憚寡賑窮乏九族以親之鄉黨以藹之居十餘年家累千金矣其鄰國有媮衣食帶刀歛推埋胠篋之類鬪鷄走狗之豪莫不靡下風馴雅素曰里有仁焉吾何從也遂頓浮窳之節肅恭儉之行修孝悌飾廉耻將欲效君之素業也時年已耳順素無經世之

情林園遺老玄默忘歲遂休先君武東山之故居行不由徑非公事未嘗至於州縣也昔襄陽有龐德公谷口有鄭子真東海王霸西山石才皆避世之人養德退耕以求志軒冕不可得而羈憂患不可得而累遠于我君作者五人矣於戲古者至人不利為得而不務近貴量腹而食度身而衣非其道萬鍾不足豐也非其榮五鼎不足鉏也躬勤耕植其杖而耘不答子路之問者豈我君之徒與綿綿羅網冥冥高鴻趨趨竹竿穆穆幽龍其與禍敗之遼絕胡越哉然則兩藝不免於蘭焚二老不免於薇歎其近貴利耶夫上無憂悔下無飢寒含道以制嗜慾達命以順生死仁以愛身智以養德俾尔耆而

艾俾尔昌而熾君子保之以永壽攷非我君者乎享年
八十有五太歲壬辰五月十三考終厥命臨終戒曰啓
予足啓予手我聞古人有言珠玉而瘞之是暴骸於中
原也古者不封不樹後世聖人易之以棺槨吾不敢違
聖人可具棺槨而已歛以常服墳無丘壠吾將庶幾以
奉先人之情也有子某等皆能祗奉遺訓率從先志長
壽二年龍集癸巳月日歲月載踰下地時吉始啓殯昭
告奉遷於舊塋武東山之陽禮也鄉里會哭者千餘人
皆涕泣號慕悲純德之不見咸曰君子沒矣仁何以名
陵谷不朽匪唯頌聲小子不敏謹述鄉人之教詞曰
肅肅我祖國始於陳中裔淪喪洎此江濱山川隆鬱旌

非氣氤生我君子於鑠元與性孝肅悌惟仁善鄰樂我
耕稼忘我縉紳茫茫田蕪成也其春農人肅事君子犒
勤孰為夫子植杖而耘戈也何慕鴻飛高雲楚狂懼世
夷叔求仁良獨終矣不攷一身我異於是非隱非淪撫
化隨運安排屈伸天年既終長夜何辰聖達不免宇宙
同塵桐棺三寸豈我寡貧古有禮吾後聖人嗟爾百
代子子孫孫驕奢自咎天道無親思我松柏恭儉是遵

陳伯玉文集卷第五終

陳伯玉文集卷第六

新都楊春重編

射洪楊澄校正

誌銘

府君有周文林即陳公墓誌文

公諱元敬字某某先陳國人也五世祖太樂染大同中
為新城郡司馬生高祖方慶好道德墨子五行秘
書白虎七變法隱於郡武東山生曾祖湯湯為郡主簿
湯生祖通通早卒生皇考辨為郡豪傑公河目海口驚
鎮虎頭性英雄而志尚玄默羣書秘學無所不覽年弱
冠早為州閣所服耆老童幼見之若大賓二十二鄉貢

明經權第拜文林郎屬憂艱不仕潛道育德穆其清風
邦人馴致如衆鳥之從鳳也時有決訟不取州郡之命
而信公之言四方豪傑望風景附朝廷聞名或以君為
西南大豪不知深慈恭懿敬讓以德也州將縣長時或
陳議青龍祭未唐曆云微公乃田棲絕穀放息人事餌
雲母以怡其神居十八年玄圖天象無所不達嘗宴然
坐謂其嗣子子昂曰吾幽觀大運賢聖生有萌芽時發
乃茂不可智力圖也氣同萬里而遇合不同造膝而悖
古之合者百無一焉嗚呼昔堯舜合舜與禹今天下
得之四百餘年湯與伊尹合天下歸之五百年文王與
太公合天下順之四百年幽厲版蕩天紀亂也賢聖不

相逢光賤仲尼淪溺世不能自昌故有國者享年不
永彌四百年餘戰國如糜至於赤龍之興四百年天紀
復亂夷胡奔突賢聖淪亡至於今四百年矣天意其將
周復乎於戲老矣汝其志之太歲己亥年七十有四七
月七日己未隱化於私館孤子子昂愚昧鞠然在疚不
知所從乃祇馴聖人卜宅之義是歲十月己酉遂開拔
舊塋奉寧神於此山石佛谷之中堂也銘曰

賢者避地邀其往兮鳳兮鳳兮誰能象兮嗚呼我君懷
寶不試孰知其深廣兮悠悠白雲自怡養兮大運不齊
賢聖罔象兮南山四君不遭漢天子固亦商丘之遺壤
兮

中州司馬王府君墓誌

君諱某字某先太原人也昔周文王有聖人之德甲子受圖至我靈王誕膺丕顯太子晉得鳳凰之瑞恭揖羣后上為帝賓綿綿生人作我王氏述秦有貴勇并吞諸侯晉有澤祥功格帝室魏至慧龍為貴種矣十二代祖卓晉常山公主子也始公主湯沐邑在汾陰永嘉淪夷不及南度因樹粉櫛而結廬焉卒葬于長壽原至今鄉有太原之號也曾祖亮周開府儀同上大將軍隋信州刺史躡組之師也祖儉隋離石郡守唐石州刺史贈岳州總管唐武烈侯社稷之器也父謀唐雲部郎中荊州大督府司馬高驛廊許冀五州刺史加銀青光祿大夫

瀘州都督金水敏侯上柱國廊廟之才也敏侯有功于國始賜土田白茅苴之在鄆之曲回食菜今為雍州人君即敏侯之元子炳靈珍粹輝來函黃愿而以恭寬而以栗青衿聞道已克大矣天子立大學所以養賢公子齒上庠所以觀國君休烈淵塞志業雲翔年若干為國子生其中射策甲科解褐補吳府參軍事昔吳王帝之愛子國選英靈君三德允章六行既穆與某郡劉孝孫首先此舉誦詩三百和淑其仁而醴酒不蒸楚筵亦廢坐除滑州錄事參軍又轉隴州錄事參軍時樂城公劉仁軌以宰相之貴持節此州暖然推中主諾責下君提綱未幾羣轄載字公坐嘯以為能也舉遷汾州平遙縣

令其地有臺台之恠蟋蟀之人君黃鼎分中鳴琴不下
鐘鼓既考風俗先和帝白良哉而格我政加朝散大夫
遷岐州扶風縣令昔尹翁歸以文武之幹緝熙此邦黃
圖雖寧亦允未天君以庚斷甲距設匪投鉤楮裾始絕
聖面咸草丁我敏侯艱遂茹哀苦廬街恤終紀是歲申
國不理元察佇才制加朝請大夫授申州司馬屬大夫
人有羸老之疾去官不之白華增動線衣是慕至於朝
盟夕膳俛色承歡夔夔齊栗蒸蒸不遺有君楚老萊子
之為嬰兒也嗚呼昊天不弔降我鞠凶大夫以眉壽竟
時君年已七十二矣禮以飲酒而君絕漿粟以降哀而
君泣血煢煢在疚靈棘其心新谷未升匪義以殞以其

年青龍癸巳竟於其里第之正寢孝之終也嗚呼哀哉
昔聖人五十而慕先子謂之正德今君七十二而盡其
衷非欺篤允元深仁淑德者時能離此哉夫人私農揚
氏隋內史侍郎丹川公演之孫女也幼有淑德而義令
儀採繁昭華穠荷比秀至於內嚴閨訓外匡君子麟趾
以穆鷄鳴有章誠道曠公宮事宣彤管晚年以儒回未
究其業惟採遂揭無生之筌將遺有漏之屣顯潔道行
愛蓮花經理極翻三心滅不二形妄緣盡歸真化冥歲
在丁酉處順而往始我府君以懸車之歲從負耒之勤
夫人亦能肅蒸晨昏嚴祗左右夫至行莫大於孝崇義
莫顯乎忠君克勤于家盡力於國刑于妻子至于朝廷

夫而與物或有違而無適義所以此君好謙達
禮研幾成務摹其法器無不馴從其事政無不理夫用
我者而豈徒執嗟乎於而能廉利而不浼百行允備二
事不階臧文仲其竊位與柳下惠其直道與有子四人
長曰某官至武連縣令先公而卒次子某等皆肅奉嚴
訓景行高山達於家邦光于禮樂永號罔極泣血昊天
始府君臨終遺令薄葬墨龜未食青烏不封權殯于某
所需吉地也龍集已亥律疆應鐘金鷄鳴玉狗吠黃腸
窳啓丹旒徐飛始遷神於某原之陽禮也青龍在左朱
鳳居右雙衾共封二室同宛珠玉不瘞丘隴誰傳刻此
金石以旌後賢

唐水衡監丞李府君墓誌銘

君諱某字某趙國人也乃昔嬴楚睽孤豪傑雲起廣武
君負霸王之畧為成安之師實欲北興帝基南面彌創
雄圖未展大運陵頽傳云有明德當代不顯其後必有
昌者自武至君二十四代矣公侯寶玉刻鼎銘鐘紛綸
歲難世濟不泯六代祖孝伯後魏部尚書秦州都督宣
城公魏之名臣載在青史曾祖某後周陝州禹城縣令
祖某屬隋運版蕩君子道消遜言適時不顯於仕拜儒
林郎父某唐隆州蒼溪縣丞襄州荆山縣尉有高才而
無貴仕君鍾常山之氣炳障水之靈少尚名節躬行仁
義始入太學以精理見知未幾進士高第拜白水縣尉

尋轉雲陽尉屈青雲之資從黃綬之任雖吏道迫肩而
選情眇然秩滿調補洛陽尉監根利器尹守拭目遷懷
州司法祿不徇榮位以行道雅尚貞遜與衆迥少合洎
上聞對策甲科授益州大都督府錄事參軍滿歲擢授
水衡監丞君所居清澹仁惠為政識真之士以公輔許
之而好學篤道介如石焉故位不克量縉紳高其才烈
士伏其義竟不能驤首雲路長鳴天衢知與不知咸皆
共歎有餘恨也而君浩然冥順獨與化遊方將幽採玄
微精覈通變天命不結春秋若千遺疾終于官某歲某
月安厝于某所禮也嗚呼古所謂歿而不朽者有矣夫
遺言餘旨粲然可觀有子曰某痛門風之將泯懼世業

之罔傳乃刊石紀德銘旌之曰

常山之靈和氏之英世有明德鍾此令名黃黻不貴洪
璧為輕仕以弘道祿匪伯榮高志厲雲思機入冥嗚呼
天乎殲我國禎

唐故循州司馬申國公高君墓誌并序

君諱某字某渤海蓆人也昔周天子命我太公受封東
海鍾鼎寶玉七百餘年故其公侯世有國祀魯祖勵字
敬德北齊朔州大行臺僕射襲爵清河王改封樂安王
周授開府隋授揚楚洮三州刺史使我唐有命崇寵典章
貞觀初贈恒定并趙四州刺史垂拱中又贈特進非明
德上公孰享之哉

祖宗儉字士廉皇朝太子太傅上柱國申國公食邑三千戶贈司徒并州刺史永徽初贈太尉配享太宗文皇帝朝廷謚曰文獻昔帝光天下公實佐之至是元勳克配清廟父慙字履行秦府軍直千牛滑州刺史將作大匠金紫光祿大夫太常卿涇州都督上柱國申國公尚東陽長公主駙馬都尉哀冠禮樂盡在是矣故帝乙歸妹尚于中行公則駙馬之元子也含章丹穴籍寵黃扉承禮訓於公庭盡儀刑於士則年若干嗣封申國公十回解巾授千牛備身趨奉紫璋已有光矣秩滿補海監府左果毅都尉再遷游擊將軍右帥府郎將遂昇榮禁衛承寵司階千廬之務式遵八舍之榮收襲又授朝

散大夫尚輦奉御再遷尚衣奉御屬宸宮搆難巫蠱禍興坐堂第岐左遷循州司馬蒼梧南極桂海東浮是唯篁竹之區而有山夷之患永隆二年有盜攻南海廣州邊鄙被其災皇帝哀洛越之人罹其凶害以公名家之子才足理戎廼命專征且令招尉一作公奉天子威令以喻越人越人來蘇日有干計公乃惟南蠻不討之日久矣國有大命將布遠方欲巡禦象林觀兵海裔彼蒼不弔天我良圖回追寇至廣州遇疾薨於南海之旅次時年若干嗚呼哀哉珠鼎之秀邦國之光負才能重言細方將克崇舊業祗寵前人降年不長永隆厥緒嗚呼哀哉夫人京兆韋氏銀青光祿大夫太子詹事武

陽侯琨之弟某女也有淑慎之德窈窕之賢長于公宮
少習婦道年十六歸于中國鳳臺尊閔鵲巢斯在雖珠
玉翡翠職是其儀而澣濯蘋蘩不改其操故我君子琴
瑟友之年三十儀鳳二年先公而歿其年權殯先塋嗚
呼哀哉始公之適南裔也夫人逝矣死生言別永懷燕
越之悲旌旆同歸終論松栢之路先是公有命令葬弘
道歲靈視自南海還嗣子紹等追惟永終仰遵先志粵
載初元年歲在攝提格始昭啓亡靈改卜遷祔某月日
遂合葬於少陵原禮也嗚呼哀哉霸山南望秦川滿目
紫臺鍾鼓方對於青春白楊丘陵獨悲於玄夜紹等以
東西之人懼岡陵之變古不樹今則墳焉

率府錄事孫君墓誌銘并序

嗚呼君諱虔禮字通庭有唐之人也幼尚孝悌不
及學文長而聞道不及從事祿值凶孽之灾四十見君
遭謫應之議忠信實顯而代不能明仁義實勤而物莫
之貴陞厄貧病契濶良時養心恬然不染物累獨攷性
命之理庶幾天人之際將期老有述死且不朽寵榮之
事於我何有哉志竟不遂遇暴疾卒於洛陽植業里之
客舍時年若干嗚呼天道豈欺也哉而已知卒不與其
遂能無慟乎銘曰

嗟嗟孫生見爾迹不知爾靈天竟不遂子願分今用無
成嗚呼蒼天吾欲訴夫幽明

故宣議郎騎都尉行曹州離狐縣丞高府君墓

誌銘

君諱某字某先渤海裔人也曰仕居洛今為陽翟人昔
赭鞭乘運轅炎帝之宗蒼光應期承太公之胤宗勳霸
業光烈猶存曾祖某止齊太子中舍人贈冀州刺史青
宮近侍光寵朝班臭蓋追榮恩崇國禮祖欽仁隋左親
衛大都督檢校秘書郎帶七尺劍始遊天子之階持三
寸筆終入芸香之閣父柚唐江州潯陽縣令舒州懷寧
縣令絃歌之化身不下堂神明之威虫蝗避境君即懷
寧府君之長子黃河一直青松萬仞性惟仁孝行實溫
恭文義必以潤身名節由其狗物唐龍朔元年有制舉

忠鯁君對策及第試守秦州湘源縣尉佐卑黃縷志在
清規秩滿以常調補鳳州黃花縣丞梁竦長懷尚勞州
縣桓譚不樂空負琴書又轉易州遂城縣丞以膏輅之
材趙典之任古人斯在君子居之大周革命任曹州離
狐縣丞而已高日月方出武盡美矣不得夷齊之臣文
哉郁乎自邈夏商之道於是回階秩滿告老歸閑閉郊
扉于南野習巖居於東澗詩書琴酒以觀先達之風山
水丘園將為遺老之賞天授二年歲在單闕七月二十
日攷終厥命卒於陸渾縣明鳥之山莊時年七十有二
嗚呼哀哉君雅尚節義素履元亨懷古人之遠圖慕先
賢之遺烈以為桓雅石椁非則於禮經墨翟桐棺寔宜

於聖典遺令薄葬務取隨時即以其年十月葬於北印
山平樂之原禮也嗣子思恭孝思罔極喪制過哀思封
樹而緬懷恐東西而不志白楸為椁奚遵古葬之儀卅
漆題封即表永年之記銘曰

泱泱大風其太公兮穆穆君子紹厥宗兮忠鯁察廉仕
漢宮兮高才位卑攷終命兮哀哀孤子號蒼穹兮歸葬
平陵栢松桐兮

唐故袁州參軍李府君妻清河張氏墓誌銘

夫人清河郡東武人也昔軒轅錫胤孤矢崇威畏其神
者三百年得其姓者十四族金貂七業漢天子之忠臣
鼎足三公晉武皇之名相孤卿玉帛世有其庸曾祖某

北齊太常卿徐兗二州刺史天人之禮位掌於秩宗侯
伯之尊寵優於露冕祖某隋汾陰壽春陽城三縣令龔
公侯之瑞屈銅墨之班士元非百里之才太丘有三台
之望父唐戶部侍郎復亳建三州刺史尚書北斗始賢
於南稟柔成性蘊粹含章承禮訓於公庭習威儀於壺
則夫其窈窕之秀婉孌之姿貞節峻於寒松韶儀麗於
溫玉鉛華不御飾環珮之容浣濯是衣勤黼黻之綵自
作嬪於君子主中饋於家人三十之禮不違九十之儀
無慮至乃恭於奉上順於接下仁孝以承宗祀慈惠以
睦閨門則雍雍嗒嗒必由其道矣嗚呼府君不造邈此
閔凶中年不圖早世而殞青松摧折哀斷女蘿之心卅

桂孤高終守栢舟之誓而府君食先人之德無後生之
財夫人狗黔婁之貞闕丹臺之產孀居永日蓬首終年
處貧素而彌堅保幽芳而不昧始府君之逝有四子焉
少遭罔極之哀未奉過庭之訓夫人保持名教終始禮
經既勗之以義而又申之以遠大皆能率由慈訓克荷
嘉聲箕裘之業載隆燕翼之謀不殞非夫淑明賢懿聖
善溫良崇婦道之深規弘母儀之至範孰能昭宣令聞
若斯之盛哉彼蒼不悅殲我眉壽春秋若干載初元年
月日遘疾終於洛州某里之私第嗚呼哀哉夫人令儀
有穆惠聞無喧敦雅志於詩書婉嫺情於琴瑟若乃姆
師酒食之儀女工纂組之繁莫不總制清理弘宣懿則

茂蘋繁之雅訓協洽江之芳猷古釋敬姜詩云淑女論
容比德殆無以過穠華不居松高永闕嗣子某等悲摧
藥棘思結寒泉永惟同穴之儀仰遵歸祔之典以大周
天授二年二月日朔遷祔於袁州君之舊塋禮也合葬
非古奉周公之儀墓而為墳宗仲尼之訓嗚呼鴛鴦之
樹眇泣於松楸鼓吹之列緬然于丘壠原陵何代銘誌
無文有哀黃鳥之詩遂勒青鳥之誌銘曰
詩云淑女君子好求懿哉令德嘉儀聿脩溫容玉映峻
節松楸妙心彤史潔志玄猷昭宣壺則惠穆蘋洲共伯
早逝貞姜獨留莞居蓬首哀深栢舟彼蒼不憇此夜長
幽懷南風之吹棘想北隴以同丘青春芳白日獨昭昭

以悠悠

上塲高氏墓誌銘

維唐垂拱二年太歲景戌七月二十日塲子高氏卒嗚呼哀哉瓊敷而不玉寔者有矣夫吾觀顯元機化出入天壽之數榮落之原皆一受而不易者也悲夫古人之仁懿中庸不幸短命今復見之於高子子渤海裔人也黃州府君之幼孫苑丘府君之叔子生而岐嶷寔覃寔華越在襁褓神明滋茂童蒙涵敏光潤玉顏八歲始教方書受甲子巳知孝悌之道詩禮之規苑丘府君鍾愛之他日嘗趨庭與諸兒戲神情涵泳綽然如鴻雛鵠子有青雲之意也府君美之曰能光我家者此兒十五通

左氏春秋及尚書泐灑之志日新宏大夫不幸享年十七遇疾而夭嗚呼哀哉苑丘府君感慟哀過於禮不恨爾壽之不長惜爾器之不彰夫何苗裔今也則亡嗚呼吾將老矣遠爾何哉某年七月殯於家園日月云徂六載于茲矣天鳳二年龍集辛卯府君方大崇元域以安先兆諸子之柩皆附焉其年一月癸卯朔十八日庚申啟殯歸塋之塋禮也銘曰
來不可過去不可止唯死與生由生以死於戲塲子噫何往矣傷慈父之肝情獨冥冥而長已死而有知可也若其無知悲爾

堂第致墓誌銘并序

君諱攷字無忌其先陳國人也六代祖太樂梁大同中
為本郡大司馬生五代祖方慶屬梁亂始居新城郡武
東山高祖湯為郡主簿生曾祖通早卒通生皇祖辯少
習儒學然以豪並剴烈著聞是以名節為州國所服皇
祖生攷元爽保植先人茂德降生於君幼孤天資雄植
英秀獨邁性嚴簡而尚倜儻之奇愛廉貞而不拘分獨
之操始通詩禮畧觀史傳即懷執物之標希曠代之業
故言不宿諾行不苟從率身克己雖道崇德閨門穆穆
如也鄉黨恂恂如也至乃雄以濟義勇以存仁貞以立
事毅以守節獨斷於心每若由己實為時革所高而莫
敢與倫也是以鄉里長幼望風而靡邦國賢豪聞名而

悅服方謂拂羽喬木緬昇其雲而遭大過棟橈而殞嗚
呼天降吊乎時年三十五是歲龍集癸巳有周天授二
年七月卜兆不吉權殯於真諦寺之北園始以今甲午
歲穀春一月己酉朔二十五日己酉安于石溪山之北
岡陪秀墳也君家世墳壠在武東山昭穆崇封松柏列
盛至君攷遺令獨愛石溪之岡故君從先志附葬于此
嗚呼哀哉始君伯父海內之文人也含純剛之德高代
之行每見君嘆曰吾家世雖儒術傳嗣然豪英雄秀濟
濟不泯常懼後來光烈不象先風每一見爾慰吾家道
實謂君有送羣之骨拔俗之標越山越壑可以駿邁也
豈其天絕喪茲良圖嗚呼其元命歟遭命歟天不沈歟

道固謬歟大圓蒼蒼大方茫茫賢聖同此爾之何傷古
人有言珠玉而塵是暴骸於中原况吾家道尚儉名訓
未墜封樹之禮吾敢過焉是用錫尔尾木之器奎芻之
靈堯舜之典忠孝之經昭示後代以安尔形銘曰
我祖之歲誕兮邈於陳緬遠裔兮此江濱五代崇光兮
至夫君微烈英曜兮始氣氲何意嚴霜兮降青春玉樹
摧落兮成黃塵南山無隳兮永幽淪悠悠昭代兮卜尔
辰吾慟感傷兮號蒼旻問之蒼策兮立茲墳乃言千載
兮衣冠來臻黃頭兮勿傷神

館陶郭公姬薛氏墓誌銘并序

姬人姓薛氏本東明國王金氏之胤也昔金王有愛子

初食於薛曰姓焉世與金氏為姻其高曾皆金玉貴臣
大人也父永冲有唐高宗時與金仁問歸國帝疇厥庸
拜左武將軍姬人幼有玉色敷於穠華若彩雲朝外微
月宵映也故家人羨之少號仙子聞麻臺有孔雀鳳凰
之事瑤情悅七年十五大將軍薨遂剪髮出家學金山
之道而見寶手菩薩靜心六年清蓮不至乃謠曰
化雲心兮思淑真洞亦滅兮不見人瑤草芳兮思益益
將奈何兮分青春遂返初服而歸我公郭公豪蕩而好
奇者也雜珮以迎之寶瑟以友之其相得如青鳥翡翠
之婉孌矣華繁艷歌樂極悲來以長壽二年太歲癸巳
二月十七日遇暴疾而卒於通泉縣之官舍嗚呼哀哉

郭公恍然猶若未亡也寶珠以含之錦衾而舉之故國
遙遙言歸未遑留殯於縣之惠善寺之南園不忘真也
銘曰

高丘之白雲兮願一見之何期哀淑人之永逝感緇園
之春時願作青鳥長比翼魂魄歸來遊故國

唐陳州宛丘縣令高府君夫人河南宇文氏墓

誌銘

夫人諱某河南郡人也昔吾君夏后氏之子霸有幽都
皇運地興鼎國南起開寶符而帝天下撫璿璣而王中
國則後周之受命武帝之雲孫夫人四代祖也曾祖某
失周之子封己山陽之國雖存天子之胤已類咸陽布

衣植德早失祖某隋朝官澧州澧陽令父某龍州司法
皆承家席寵世有令名夫人貴穠華釅繁社崇徽惠摯
秀色苔榮自于幼年有令儀也十四適于高府君夫其
溫慈惠和信肅脩穆行有法度動有禮經嚴恪以理家
人嫺慧以和君子則已含乎光大矣若乃宗廟哀敬仁
孝也娣姒祇和謙順也醴潔酒食婦儀也黼黻玄黃女
工也弘此四德而務六親擊悅以文之雜佩以發之猗
可以作範母儀昭宣壺則美至於訓子以睦教女以順
愛下以慈與人以讓外以贊府君之德內以光中饋之
教皆曰聞其進不見其退也嗚呼仁而不壽生也永中
永淳元年五月遇疾終于宛丘縣之官舍年二十七嗚

呼哀哉高府君尋以事罷職山陰未卜旌旒來歸府君
思北海之魂留東園而殯日月遂往九歲于茲府君方
崇樹先塋增封舊域以周天授二年太歲辛卯二月癸
卯啟殯於東園祔於洛州其原禮也哀哉夫人雖有高
行終而不忘以為厚葬非禮也是以珠玉不飾璽瓦是
藏高府君聿遵其志率以薄葬於戲非古之明德泚女
金玉其光何以躋之吾泰門閭之賓其家道矣雍穆
懿鑠寔有清風故叙之而未克德也銘曰
夫天飛李有華号灼灼淑人宜家号脩睦婦道不譁号
窈窕曠儀孔嘉号榮采之方茂而云亡号咨嗟

周故內供奉學士懷州河內縣尉陳君頌人

墓誌銘

君諱該字君表綿州顯武人也其先自顯川遷蜀其曾
祖寄祖曾考永貴百養高不仕君少好學能屬文上元
元年州貢進士對策高第釋褐授將仕郎其明年制勅
天下文儒司屬少卿楊守訥薦君應詞翰文律對策高
第勅授茂州石泉縣主簿開耀元年制舉太子舍人司
議郎大府少卿元和知讓應制薦君於朝堂對策高第勅
授隆州蒼溪縣主簿垂拱四年又應制舉綜古今對策
高第勅授懷州河內縣尉凡應所職皆以清廉仁愛著
聞有周革命天授三年恩勅自河內進入關供奉居未
暮不幸遇疾於神都積善坊致終厥命年六十三歸葬

於豆四山之陽原禮也嗚呼哀哉古人有云飾類夷之
行不逢青雲之士而聲名磨滅者有之矣嗚呼陳君敦
懿玄默潔清溫良馴道執志好學博古徇徇焉行高職
卑不改其操學優祿薄不怨於天四舉有道三應下位
晏如也非博人淑士其誰能涅而不渝哉夫知命可謂
君子矣好學可謂為文矣丹書不藏於勛府青史不昭
於方冊於戲一絕故老之口孰知夫子之賢哉其與君
族人也服美其德尚矣昔子雲稱李元常瓊叙令伯皆
沒而不朽後代稱之斯非君人之徒歟吾豈默而無述
其銘曰

閨閣君子好斯文兮縹藻肇章潛卿雲兮棲遲下位允

升聞兮金署玉堂見吾君兮鸞階鴻漸期紫氣兮鍾鳴
漏盡竟蘭焚兮儒行墨節將何云兮恭承遺言立石文
兮金刻丹書記歲辰兮青龍甲午銘茲墳兮

燕然軍人畫像銘并序

龍集丙戌有唐制匈奴五十六載蓋署其君長以郡縣
畜人荒服賴寧古所莫記是歲也金徽州都督僕固始
祭驚惑亂其人天子命左豹韜衛將軍劉敬同發河西
騎士自居延海入以討之特勅左補闕喬知之攝侍御
史護其軍夏五月師舍於同城方絕大漠以臨瀚海君
子曰兵者凶器仁何至之醜虜猖狂厥自招劄今至尊
不得已而順伐嘗聞西方之聖有能仁者凶吉之業各

報以直則使元惡授首羣賊不孤立無血刃荒我底定
豈不在於大雄乎諸將部校僉曰元戎將軍乃飾躬率
士卒自古祠廟圖畫形容有古之弥勒像也天人備容
丹青畢彩蓋以昭乎景福也乃作銘曰
耀天兵兮征荒服絕雲漢兮出玄極白羽飾兮青雲旗
簫鼓鳴兮士馬悲願左右兮浮屠道備丹青兮妙天寶
功既畢兮業既成神不來兮福冥冥

真寔官寔君古墳記銘為張昌寧作

神功元年龍集丁酉我有周金草道息寶鼎功成朝廷
大寧天下無事皇帝受紫陽之道延訪玉京羣臣從白
雲之遊載馳瑤水笙歌入至玄鶴飛來時余以銀青光

祿大夫忝在中侍擁青旄之節陪翠鸞之旗昔奉車子侯
獨隨武帝昌明為御史每侍軒遊比之今日未足多幸是
時屢從嚴祀遙謁秘封嘗親衆靈如雲群仙蔽日乃仰感
王子晉俯接浮丘公行吹洞簫坐弄雲鳳竊欲邀羽袂尊
鸞輿求不死於金庭保長生於玉冊上以尊聖壽下以息
微躬曰登緱山望少室尋古靈跡擬刻真容得王子晉之
遺墟在永永之層曲且欲開石室營壽宮庀徒方興畚鍤
攸作乃得古藏焉其藏上無封墳內有甓瓦南北長二丈
二尺東西濶八尺中有古劍一長尺餘銅碗一并瓦器二
其器文彩恠異非蟲篆雕斲所能擬也又有古五銖錢朱
漆片數十枚初開時文彩可見及振撥之應手灰滅既無

年代銘誌不知爵里官族參驗其事已曾為人所開於是
撫之永懷念昔增密始知有形必弊涉器則毀鍾鼎玉帛
非度世之資名位寵章為累真之府未能獨立物表超世
長存與日月齊光天地比壽非夫道乎冥冥霄冥君久出
珎藏迨此昭發豈不欲感示玄契奇暢靈期昔王喬古墳
唯留一劍令威荒塚又歎千年起予道心在乎此仰惟聖
主仁慈恩被草木陽和掩骼既昭國典至德埋齒又在周
令今此藏虧露誠感仁惻謹曆吉日協良辰即以其年十
月甲子朔具物備容還定舊壙豚鷄在奠犧罇若歆哀其
銘誌磨滅姓位不顯乃錫之名曰冥冥君其銘

陳伯玉文集卷第六終



卷一